

Sakspapir

Saksnr	Utvalg	Type	Dato
099/20	Kommunestyret	PS	12.11.2020

Saksbehandler	Arkiv	ArkivsakID
Asbjørn Nagell Toft	FE-141, TI-&37	19/743

Planstrategi for Austrheim kommune 2020 - 2024 - Godkjenning

Vedlegg

Planstrategien 2020-2024 - til kommunestyret

Aksjonsgruppa "nei til rasering av Øksnesmarka og Åråsvågen" merknad til planstrategien

Statens Vegvesen - Uttale - Planstrategi for Austrheim kommune 2020-2024

Merknad - planstrategi for Austrheim kommune 2020 - 2024

Merknad - planstrategi for Austrheim kommune 2020 - 2024

Merknader til planstrategi for Austrheim

Fylkesmannen i Vestland - uttale - kommunal planstrategi 2020 - 2024

Asbjørn Brandtun - uttale - planstrategi for Austrheim Kommune 2020-2024 - Høyring

Fiskeridirektoratet - uttale til Planstrategi for Austrheim kommune 2020-2024

Innspel frå Ap og Høgre - Planstrategi for Austrheim kommune 2020

Framlegg til vedtak:

Planstrategi for Austrheim kommune 2020-2024 vert godkjent. Grungjevinga er gjeve i saksutgreiinga. Vedtaket er heimla i plan- og bygningslova sin § 10-1.

Styringsgruppa for planstrategiarbeidet er formannskapet.

Kommunestyret - 099/20 - 12.11.2020

KS - behandling:

Avdelingsleiar Asbjørn Toft orienterte om saka.

Jan Erik Espelid (Bygdelista) sa at det må vera samanheng mellom samfunnsplan og planarbeid som vert starta opp. Han ba om at styringsgruppa for planstrategiarbeidet blir utvida med ein representant frå Bygdelista.

Avdelingsleiar Asbjørn Toft sa at dette med styringsgruppa for planstrategiarbeidet er omtala tidlegare, og i saka er det lagt inn det som er vedteke i formannskapet.

Reidar Øksnes (Sp) sa at det er naturleg at dette kjem som ei eiga sak til kommunestyret, sidan det er kommunestyret som har bedt om dette.

Inger Lise Brekke (H) sa at det ikkje er naturleg å votera om ei utviding av styringsgruppa inn i denne saka, men er gjerne med på å sjå på utvalsmodellen.

Per Lerøy (Ap) sa at det er to ulike saker, om medlemmer i styringsgruppa og utvalsmodellen.

Reidar Øksnes (Sp) sa at han held på at at det må komma ei eiga sak om korvidt styringsgruppa for planstrategien skal vera lik arealplanutvalet.

Jan Erik Espelid sa at han trekker framlegget om ein då kjem tilbake med ei eiga sak. Dette er framlegget som vart trekt:

1. I samsvar med kommuneplanen sin samfunnsdel der det heiter at Austrheim kommune ska «utarbeida kommunal temaplan mot attgroing, med mål, strategiar og tiltak» vert dette planarbeidet starta snarast råd, anten som eigen temaplan eller som del av revisjon av landbruksplanen.

2. Styringsgruppa vert utvida med ein representant frå Bygdelista.

Per Lerøy (Ap) sa at ein då ber rådmannen greia ut til neste kommunestyremøte om styringsgruppa for planstrategien skal vera lik arealplanutvalet.

Handsaming i kommunestyret:

Samrøystes for rådmannens framlegg til vedtak.

KS - vedtak:

Planstrategi for Austrheim kommune 2020-2024 vert godkjent. Grungjevinga er gjeve i saksutgreiinga. Vedtaket er heimla i plan- og bygningslova sin § 10-1.

Styringsgruppa for planstrategiarbeidet er formannskapet.

Saksopplysninger:

Behandling i formannskapet den 22.10.2020:

Avdelingsleiar Asbjørn Toft orienterte om saka.

I samband med kven som skal vera i styringsgruppa sa kommunalsjef Bjørnar Fjellhaug at administrasjonen ikkje såg at det var naudsynt å laga ei eiga sak på dette, sidan det låg i vedtaket at det er formannskapet som er styringsgruppe. Avdelingsleiar Asbjørn Toft sa at det uansett er mogleg for kommunestyret å gjera ei endring på styringsgruppa direkte i møtet.

Om planstrategien elles sa avdelingsleiar Toft at den er førande, men at det kan gjerast endringar undervegs framover.

Rådmann Liv Løvvik viste til at det er gitt nasjonale innspel på planar, som for diskriminering, likestilling og for vald i nære relasjonar. Om dette svara avdelingsleiar Asbjørn Toft at det også skal lagast ein kommunedelplan oppvekst, og at noko av dette kanskje kan inngå som ein del av dette.

Morten Sognnes (H) spurte om ein ikkje bør leggja til rette for fleire bustader, om ein lukkast med industri på nytt område på Kaland. Om dette svara avdelingsleiar Asbjørn Toft at det alt er ein tomtereseerve på rundt 500 bustader i Austrheim (på private hender), av dette er kring 150 i Kalandkrinsen. Viste vidare til at det på Kaland er på plass reguleringsplan for skulen og barnehagen, og for

gangveg frå Fønnesvågen til Kaland skule.

Er elles langt på veg med regulering av gang- og sykkelveg, om ein får regulert frå Fønnes til Kilstraumen så er det regulert gang- og sykkelveg gjennom nesten heile kommunen.

Morten Sognnes (H) viste til at det er på strekket Fønnes-Kilstraumen det har skjedd flest ulukker, så det er viktig å startar der. Per Lerøy (Ap) viste til at det også kan opna for nye bustader om ein får bygd i alle fall deler av dette strekket.

Avdelingsleiar Asbjørn Toft sa at administrasjonen gjer mest mogleg av planarbeidet sjølv, men at politikarane må vera klare over at det må leigast inn planfirma til ein del av arbeidet, som må dekkast inn gjennom budsjetta. Når det vert laga planar på areal som kommunen eig sjølv, kan det leggst inn som ei investering slik at det kan avskrивast.

Kommunalsjef Odd Harald Dommersnes viste til at dette med diskriminering no er innskjerpa frå statleg hald, og at det skal med i årsmeldinga frå kommunen. Etter litt diskusjon vart det konkludert med at diskriminering kan lagast som ein temaplan.

Barne- og ungdomsplanen skal begynnast på i 2021.

Handsaming i formannskapet:

Samrøystes for rådmannens framlegg til vedtak.

FS vedtak (sak 115/20):

Planstrategi for Austrheim kommune 2020-2024 vert godkjent. Grungjevinga er gjeve i saksutgreiinga. Vedtaket er heimla i plan- og bygningslova sin § 10-1.

Styringsgruppa for planstrategiarbeidet er formannskapet.

Saksopplysingar:

Formannskapet vedtok den 20.08.2020 å senda **Planstrategi for Austrheim kommune 2020-2024** ut på høyring. Høyringsfrist vart 1. oktober 2020. Det vart også vedteke i same møte at formannskapet, som også er planutval i Austrheim kommune er styringsgruppe for arbeidet med planstrategien.

Kommunestyret vedtok den 12.12.2020 at Austrheim kommune sitt arbeid med planstrategi skulle starta opp. Kommunestyret skal minst ein gong i kvar valperiode, og seinest innan eitt år etter konstituering, utarbeida og vedta ein kommunal planstrategi. Den kommunale planstrategien skal vera eit hjelpemiddel for det nye kommunestyret til å avklare kva planoppgåver Austrheim kommune skal prioritera i valperioden. Planstrategien bør drøfta kommunen sine strategiske val knytta til samfunnsutvikling, langsiktig arealbruk, miljøutfordringar og sektorane sine arbeidsoppgåver. Ved handsaminga skal kommunestyret ta stilling til om gjeldande kommuneplan eller deler av denne skal reviderast, eller om planen skal videreførast utan endringar. Kommunestyret kan og ta stilling til om det er trong for å setja i gong arbeid med nye arealplanar i valperioden, eller om gjeldane planar bør reviderast eller opphevast.

I kommunestyremøtet den 12. desember 2019 (sak 079/19) tok Bygdelista opp samansetninga av styringsgruppa i planstrategiarbeidet, Bygdelista ville utvida denne gruppa utover formannskapet. I kommunestyret den 13. februar 2020 vart dette og drøfta politisk, utan at det vart sett ned ei ny styringsgruppe. Dette var og tema på kommunestyremøte den 24. september 2020. Formannskapet i Austrheim kommune er planutval, med ordførar som leiar og varaordførar som nestleiar. Varamedlemmer er etter varaliste til formannskapet. Rådmannen vart bedd om å laga ei sak på dette.

Samfunnsdelen i kommuneplanen som vart godkjent i 2015 seier mykje om kva utfordringar kommunen har, den har gjeve mange faktaopplysningar til dette arbeidet. Det same gjeld arealdelen til kommuneplanen som vart godkjent den 11.04.2019. Berekraftmåla til FN ligg og til grunn for planlegginga vår og planstrategien. Planstrategien er retningsgjevande og vil ikkje hindra at andre planar/ planoppgåver kan settast i gong i kommunestyreperioden. Strategien har ingen direkte rettsverknad for innbyggjarane og det kan ikkje fremjast motsegn mot den. Kommunen skal i arbeidet med kommunal planstrategi innhenta synspunkter frå private, statlege og regionale organ og nabokommunar.

Austrheim kommune varsla oppstartsvedtaket på heimesida og i avisannonse på vanleg måte. Det gjekk og ut eige skriv til lag og organisasjonar og offentlege instansar den 17.12.2019 der kommunen ba om innspel. Innspelfrist vart sett til 20. juli 2020, det kom 10 innspel til planstrategien. Til høyringfristen den 1. oktober 2020 kom det 9 merknadar, dei er alle vedlagt i saka. Merknadar som er vist i saksutgreiinga har kome frå både offentlege og private lag/organisasjonar. Desse er:

Private merknadar:

1.Austrheim Arbeidarparti og Austrheim Høgre sin merknad er datert den 24.08.2020 (vedlagt). Då planstrategien vart drøfta i formannskapet 20. august hadde H. og Ap. følgjande framlegg til endringar:

1.Kommunedelplan: *Det må utarbeidast ein **kommunedelplan knytt til rus og psykiatri**. Denne planen må utarbeidast i 2021.*

2.Temaplan: *Landbruksplanen må også innehalda ein plan for skogsforvalting. Dei ynskjer å kalla planen **Landbruks- og skogsforvaltingsplan**. Tiltak for å hindra eller avgrensa utmarksbrannar må med her.*

3.Detaljreguleringsplan: ***Bustadområdet B07 og skuleområdet ved Austrheim vidaregåande skule.** Denne planen må startast på alt dette året. Vestlands fylkeskommune kan då raskt koma i gang med vidare utbygging av AVS om dei prioriterer det. Ei omregulering av industribygget og området rundt dette må vurderast i samråd med eigarane av industribygget samstundes med at planområdet vert bestemd.*

4.Detaljreguleringsplan: *Me ønskjer at det vert regulert inn gang og sykkelveg langs fylkesveg 565 frå Fv. 57 og til Fosnstraumen. Me ønskjer at strekninga frå Fonnes til Kilstraumen skal prioriterast.*

Austrheim kommune sin kommentar:

Merknadane over er i hovudsak teke til følgje og teke inn i planstrategien. Austrheim kommune sin kommentar er at landbruksplanen kan ha som namn **Landbruks- og skogsforvaltingsplan**. På grunn av ressursituasjonen i Austrheim kommune bør ein **Detaljreguleringsplan for**

Bustadområdet B07 og skuleområdet ved Austrheim vidaregåande skule først starta opp i 2021. **Kommunedelplan knytt til rus og psykiatri** kan og starta opp i 2021. **Detaljregulering av Gang og sykkelveg langs fylkesveg 565 frå Fønnes-Kilstraumen** kan leggest inn i planstrategien og prioriterast. For å få planane på plass er det ein forutsetning at det i budsjettarbeidet hausten 2020 og hausten 2021 vert løyvd midlar og sett av ressursar til desse planoppgåvene.

2.Bygdelista i Austrheim sin merknad er datert den 30.09.2020 (vedlagt). Dei skriv mellom anna følgjande:

Austrheim kommune har gjennom planstrategien mulighet til å klargjøre hvilken profil kommunen ønsker utad. Bygdelista ønsker at vi skal satse og bli miljøkommune nr. 1, med gjennomført fokus på bærekraftige løsninger i planer og tiltak. Der prisverdig at kommunen i høringsdokumentet så sterkt understreker bærekraftmålene som «overordna styringsmål» og legger vekt på å «stansa tap av naturmangfold og klimaendringar». Nå gjelder å gjøre ord om til handling. Status som UNESCO biosfærakommune forplikter.

Med bakgrunn i programmet vårt mener vi følgende kommunedelplaner bør prioriteres i denne rekkefølgen:

- 1. Kommuneplanrevisjon med tilbakeføring av N18 Øksnesmarka til LNF-status**
- 2. Kommunal temaplan mot attgroing**
- 3. Kommunedelplan for naturmangfold**
- 3. Revisjon av energi- og klimaplan for Austrheim**
- 4. Revisjon av plan for folkehelse**
- 5. Interkommunal plan for sjøareal i regionen**
- 6. Revisjon av VA-planen**

Detaljreguleringsplaner

Fylkesveg 565 gang/sykkelveg parsell Litleindås til Austrheim

Parsellen er som del av Johan Sverdrup-rørgaten allerede godt utgreid og dermed et mer kostnadseffektivt alternativ enn parsellen Kilstraumen til Fønnes. Parsellen er mye brukt av (tur)gående og syklistar, men fremstår som trafikkfarlig, særlig i 80-sonen. Ved å bygge denne parsellen først, oppnår kommunen stor grad av trafikk sikring i ringen Årås-Austrheim-Førland-Solend-Årås.

Austrheim kommune sin kommentar:

Ein del av merknadane over er teke til følgje og teke med i planstrategien. Desse er.

Kommunedelplan for naturmangfold

Revisjon av energi- og klimaplan for Austrheim

Revisjon av plan for folkehelse

Interkommunal plan for sjøareal i regionen

Fylkesveg 565 gang/sykkelveg parsell Litleindås til Austrheim

Det vert ikkje gjort endringar i rekkefølga på desse planoppgåvene. Dette på grunn av ressurs situasjonen i Austrheim kommune, men det er ei målsetting å få desse planane på plass på ein fagleg god måte så fort som mogeleg. Dei andre punkta som Bygdelista tek opp (punkt 1, 2 og 6) er drøfta i tidlegare saksutgreiing, men og i politiske møte og vedtak og konklusjonar vart då gjort. For å

få planane på plass som er med i planstrategien er det ein forutsetning at det i budsjettarbeidet framover vert løyvd midlar og sett av ressursar til desse planoppgåvene.

3. Naturvernforbundet Nordhordland sin merknad er datert den 30.10.2020 (vedlagt). Dei skriv mellom anna følgjande:

Det er prisverdig at kommunen legg stor vekt på berekraftmåla som overordna mål og premisser for planstrategien. At kommunen følgjer opp med å prioritera kommunedelplan for naturmangfald og revisjon av klima- og energiplan er i så måte positivt.

Nordhordland UNESCO Biosfæreområde, som Austrheim kommune er tilslutta, vedtok 17.09.20 strategi for berekraftig utvikling i Nordhordland 2020-2024. Strategien forpliktar sjølvst og også Austrheim og bør liggja til grunn for kommunen si planlegging. Naturvernforbundet Nordhordland bed difor om at strategien vert innarbeidd i planstrategien.

I innspel til revisjon av planstrategi av 27.01.20 (vedlagt) har Naturvernforbundet Nordhordland ønskt følgjande planar:

- 1. Kommuneplanrevisjon med tilbakeføring av N18 Øksnesmarka til LNF-status*
- 2. Kommunal plan mot attgroing*
- 3. Interkommunal plan for sjøareal i regionen*
- 4. Revisjon av energi- og klimaplan for Austrheim*
- 5. Kommunedelplan for naturmangfald*

Denne prioriteringa står ved lag.

Naturvernforbundet har elles kommentert kommunen sin eigen prioritering på ein grundig og oversiktleg måte. Dei skriv mellom anna at:

Kommunedelplan for naturmangfald må føra til grundig registrering og kartlegging av artar og naturtypar slik at kunnskapsgrunnlaget i dei kommunale planane blir betre enn i dag.

Kommunedelplan for fysisk aktivitet, idrett og friluftsliv, her må friluftsliv må få høg prioritet. I sær gjeld det opplevingsbasert friluftsliv knytt til naturverdiar på land og sjø.

Klima og energiplanen må ha særleg fokus på energibruken. Den reinaste energien er den vi ikkje brukar. Det betyr m.a. meir sykkel og gange, et betre kollektivtilbod og desentraliserte tilbod med korte reiseavstandar.

Om temaplan mot attgroing skal innarbeidd i landbruksplanen, er det avgjerande at dei føringane som ligg i samfunnsdelen i høve til attgroing vert inkluderte.

Fosnstraumen har etter vårt syn nasjonal verdi. Det er viktig at ei slik regulering vert gjort med omsyn til natur-, kultur- og landbruksverdiane og utan store utsprengingar og fyllingar

Austrheim kommune sin kommentar:

Innhaldet i merknadane over vil verta drøfta og teke med vidare i dei planane som skal utarbeiddast. Naturvernforbundet vil og kunne engasjera seg i planane som skal utarbeiddast og koma med sine merknadar til planane i dei formelle høyringsprosessane. Nordhordland UNESCO Biosfæreområde, vedtok den 17.09.20 strategi for berekraftig utvikling i Nordhordland 2020-2024. Strategien forpliktar sjølvst og også Austrheim kommune. Sjølv innhaldet i planstrategien vert ikkje endra noko

på grunn av dette tilhøvet.

Dei punkta som Naturvernforbundet tek opp i punkt 1 og 2 er drøfta i tidlegare saksutgreiing, men og i tidlegare politiske møte og vurdert då. For å få planane på plass som er med i planstrategien er det ein forutsetning at det i budsjettarbeidet framover vert løyvd midlar og sett av ressursar til desse planoppgåvene.

4.Asbjørn Brandtun sin merknad er datert den 30.09.2020 (vedlagt).

Brandtun har framlegg til prioritering av to planoppgåver:

1.Næringsplan

Konklusjonen han er at: *Austrheim har difor eit stort behov for å jobba meir systematisk med ein samla plan for næringsutvikling. Dette må organiserast i eit praktisk prosjektsamarbeid med næringslivet og engasjerte personar.*

2.Austrheim vidaregåande skule (AVS).

Han skriv mellom anna følgjande: *I høyringsutkastet er det teke med arbeid med reguleringsplan for skuleområdet ved AVS. Skulen er svært viktig for Austrheim og dei mindre kommunane i området. Skulen har over mange år hatt ei negativ utvikling, med nedlegging av fagtilbod og nedgang i elevtal frå knapt 400 elevar rundt 1996/97 til ca. 200 elevar i 2020. Fylkesrådmannen foreslo i 2016 nedlegging av skulen, men fylkestinget vedtok samrøystes at skulen skal oppretthaldast og utviklast. Likevel har den negative utviklinga halde fram. Det må snarast jobbast med ein aksjonsplan på kort sikt og utarbeiding av ein utviklingsplan fram mot skulen sitt 50-års jubileum i 2027. Næringslivet, regionrådet og kommunane i regionen må ha ein sentral rolle i dette arbeidet. Austrheim vidaregåande skule har hatt ei negativ utvikling over mange år med bortfall av fagtilbod og nedgang i elevtalet. Dersom ein ikkje greier å snu denne utviklinga, vil skulen kunne verta lagd ned.*

Austrheim kommune sin kommentar:

For å få planane som er med i planstrategien er det ein forutsetning at det framover vert løyvd midlar og sett av ressursar til desse planoppgåvene. Det er ikkje ressursar med det første å setja i gang arbeid med ein ny næringsplan. Dersom den økonomiske situasjonen for kommunen endrar seg, så kan ein uavhengig av planstrategien gjennom eit eige politisk vedtak få på plass at ein ny næringsplan skal lagast.

Når det gjeld Austrheim Vidaregåande skule (AVS) så er det truleg viktigast å få på plass ein reguleringsplan på areala i og omkring skulebygget som Vestland fylkeskommune (VF) eig i dag. Der er VF både skule- og grunneigar. Austrheim kommune eig elles store område omkring denne skulen på nordvestsida. Planarbeidet i dette området er med i planstrategien for 2020-2024. Ein *aksjonsplan på kort sikt og utarbeiding av ein utviklingsplan fram mot skulen sitt 50-års jubileum i 2027* kan gjerast uavhengig av planstrategien, det er ikkje naturleg å ta dette inn her. Det er elles naturleg å ta AVS med i arbeidet med ein **Kommunedelplan for oppvekst** som skal gjerast i perioden 2020-2021.

5.Årsvågen velforening sin merknad er datert den 30.09.2020 (vedlagt). Dei skriv mellom anna følgjande:

Velforeninga er kjent med at det i kommuneplanen sin arealdel er sett av areal til industriformål i eit område i Øksnesmarka, med tilhøyrande kaianlegg i Åråsvågen. Området ligg nær bustader og fritidsbustader både på Øksnessida og på Åråssida. Det kan ikkje vera tvilsamt at områda vil bli berørte av industriverksemnd i marka og vågen. Dette gjeld særleg uttak av steinmassar, noko som erfaringsmessig fører med seg store naturinngrep samt støy og støv langt utanfor det området der verksemnda vert dreven. Eit stort kaianlegg i fjorden, vil utan tvil få negative konsekvenser for bruken av fjorden. I tillegg kjem hensynet til artsmangfoldet i området og miljøomsyn.

Velforeninga har forståing for at det er ønskjeleg med næringsverksemnd i kommunen, men meiner at det fins andre område som er åpna for slik verksemd eller som det er naturleg å åpna for det. Etter vår meining er det ikkje samsvar mellom dei formåla som er framheva i stragetidokumentet, og arealplanen for dei nemnde områda. Viktige friluftsliv, natur -og miljøhensyn er ikkje tatt omsyn til i tilstrekkelig grad. Velforeninga vil oppmoda kommunen til å endra arealplanen og ikkje tillata slik verksemd i dei omtalte områda.

Austrheim kommune sin kommentar:

Dei punkta som Åråsvågen velforening tek opp her omkring Øksnesmarka er drøfta i tidlegare saksutgreiing når det gjeld arbeidet med planstrategien, men og i fleire politiske møte, både i formannskapet i august og i kommunestyret i september. Konklusjonen er at det ikkje er politisk vilje til å rullera kommuneplanen sin arealdel i perioden 2020-2024, eller endra arealformålet i Øksnesmarka.

6.Aksjonsgruppa Nei til rasering av Øksnesmarka og Åråsvågen sin merknad er datert den 30.10.2020 (vedlagt). Dei skriv mellom anna følgjande:

Øksnesmarka har en stor verdi som friluftsområde, og mange muligheter for bruk av marka vil åpne seg ved en offisiell status som LNF-område.

Dei skriv om kommuneplanarbeidet og viser og til uttale frå Fylkesmannen om Øksnesmarka om at dette området har nasjonal verdi som naturområde. Uttalen frå Fylkesmannen er sitert i deira skriv. Til slutt skriv Aksjonsgruppa Nei til rasering av Øksnesmarka og Åråsvågen i sin merknad følgjande:

Ut fra denne uttalelsen og klare føringer for videre prosess, er det uforståelig hvordan man i dag promoterer området som et område for næring på Austrheim kommune sin hjemmeside. Vi stiller også spørsmål til hvor det «sterke ønsket» fra Kommunen kommer fra, dette har ikke kommet tydelig frem utad i prosessen. Tvert om har alle partiene, bortsett fra Ap, i programmene sine signalisert at de ikke aksepterer nedbygging av Øksnesmarka med store permanente sår i naturen. Tre av partiene ønsker tilbakeføring til LNF.

Oppsummert:

Aksjonsgruppa ber om at Øksnesmarka taes ut av arealplanen, med stor vekt på markas egenverd.

Vi mener at det må gjennomføres kommuneplanrevisjon med tilbakeføring av N18 Øksnesmarka til LNF-status.

Austrheim kommune sin kommentar:

Dei punkta som Aksjonsgruppa Nei til rasering av Øksnesmarka og Åråsvågen tek opp her omkring

Øksnesmarka er drøfta i tidlegare saksutgreiing når det gjeld arbeidet med planstrategien, men og i fleire politiske møte, både i formannskapet i august 2020 og i kommunestyret i september 2020. Konklusjonen er at det ikkje er politisk vilje til å rullera kommuneplanen sin arealdel i perioden 2020-2024, eller endra arealformålet i Øksnesmarka.

Offentlege merknadar:

1. Vestland fylkeskommune sin merknad er datert den 01.10.2020 (vedlagt). Dei meiner Austrheim kommune har gjort eit godt arbeid med utkast til planstrategi. Dei skriv elles mellom anna følgjande:

Det er positivt at planstrategien er kortfatta og strukturert etter tema, og at det er forståeleg kva som er mål/visjon for kommunen, og hensikta med planstrategien. Vi vil på eit generelt grunnlag rå til at overordna tema vert teke inn i kommuneplanen sin samfunnsdel, og som arealstrategiar til kommuneplanens arealdel, framfor at desse vert eigne planar. Fokus på aldersvenlege samfunn vil gjere bygdene meir levande og lette dei eldre sin kvardag.

Kommunen påpeike at eit godt barne- og ungdomsarbeid og eit allsidig fritid- og kulturtilbod gjer og sitt til at folk vil etablera seg i kommunen og at deltaking i frivillig arbeid og kulturtilbod er viktig for folkehelsa. Vi rår til ei sterkare prioritering for å få til ei meir framtidsretta satsing på eit allsidig fritid og kulturtilbod i kommunen. Ei kulturplan eller rullering av samfunnsdel er ei god måte å få dette til. I alle fall bør kommunedelplan for oppvekst som er planlagt i 2020 ha sterk fokus på dette. Det er positivt at kommunen skal ferdigstille temaplan for kulturminne i perioden. Utkast som var sendt til gjennomlesing var nesten ferdig. Vi rår til at kulturminneplanen prioriterast og ferdigstillast i 2020/2021. Registrerte faste kulturminne bør innarbeidast i kommuneplans arealdel. Fylkeskommunen oppmodar Austrheim kommune å inkludere «plan for friluftslivets ferdselsårer» i kommunal planstrategi. Friluftslivets ferdselsårer er et nytt nasjonalt prosjekt (2019-2023) initiert av Klima- og miljødepartementet, leia av Miljødirektoratet.

Austrheim kommune sin kommentar:

Austrheim kommune synes at merknaden til Vestland fylkeskommune er konstruktiv og positiv. Austrheim kommune meiner det er naturleg å inkludere **Plan for friluftslivets ferdselsårer** i planstrategien for 2020-2024. Det er då ein forutsetning at det kjem gode tilskotsordningar/ressursar eksternt til dette planarbeidet. Kulturminneplanen skal gjerast ferdig i 2021 slik utkast til planstrategien viser. Austrheim kommune vil elles vis at SSB sin siste prognose er at folketalet i kommunen vår vil auka med om lag 19 % fram til 2050. Austrheim kommune tek elles Vestland fylkeskommune sin merknad til orientering.

2. Fylkesmannen i Vestland sin merknad er datert den 01.10.2020 (vedlagt). Han skriv mellom anna følgjande: *Fylkesmannen vurderer forslag til planstrategi som kortfatta, lettlese og oversikteleg, med mange gode punkt. Dei ynskjer ei oppdatert folkehelseoversikt. Fylkesmannen viser også til at det er eit krav i statlege planretningslinjer for klima- og energiplanlegging og klimatilpasning at kommunen i planstrategien skal vurdere om klimaendringane fører til eit behov for oppheving eller revisjon av gjeldande planar.*

Austrheim kommune sin kommentar:

Austrheim kommune synes merknaden til Fylkesmannen er klar. Austrheim kommune meiner det er naturleg å få på plass ein oppdatert folkehelseoversikt samstundes med at ein får på plass ein folkehelseplan. Det var alt med i planutkast til planstrategien for 2020-2024 som var på høyring. Austrheim kommune skal elles utarbeida ein ny **Klima og energiplan**, her vert og klimaendringane og

klimatilpasning også eit vurderingstema. Om klimaendringane fører til eit behov for oppheving eller revisjon av gjeldande planar vart også vurdert i samband med kommuneplanen sin arealdel som vart godkjent i april 2019. Det vart då teke inn nye føresegner som styrer arealbruken i mellom anna i strandsona i forhold til stormflo og havnivåstigning med meir. I arbeidet med planstrategien har Austrheim kommune vurdert dette temaet, men ikkje omtalt dette nærare. Austrheim kommune tek elles Fylkesmannen i Vestland sin merknad til orientering

3.Fiskeridirektoratet region Vest sin merknad er datert den 21.09.2020 (vedlagt). Dei skriv at dei ikkje har merknadar til høyring av planstrategien for Austrheim kommune.

Austrheim kommune sin kommentar: Austrheim kommune tek Fiskeridirektoratet region Vest sin merknad til orientering. I arbeidet med **Interkommunal plan for sjøområda i Nordhordland** vil deira innspel/merknadar verta vurdert.

4.Statens vegvesen sin merknad er datert den 02.10.2020. Dei skriv mellom anna følgjande: *Vi er opptekne av trafikktryggleik på heile det offentlege vegnettet. Austrheim kommune har i dag ein kommunedelplan for trafikksikring. Planen har ein god presentasjon av situasjonen i kommunen då planen vart utarbeidd. Den har også ei opplisting av tiltak som bør. Dette er eit godt utgangspunkt for innspel både til regionale og kommunale økonomiplanar og årsbudsjett. Vi ser at planen gjeld for perioden 2016-2023, og oppfordrar om at rullering av denne planen blir teken med i planstrategien for dei neste åra.*

Austrheim kommune sin kommentar: Austrheim kommune vil peika på at **Kommunedelplan for trafikksikring** i kommunen vår gjeld i perioden 2016-2023. Den er såleis førande i ein del år enno, og det vert årleg følgd opp i søknadar om tilskot til trafikksikringsarbeid i kommunen vår. Austrheim kommune tek merknaden til Statens vegvesen over til følgje. Rullering av **Kommunedelplan for trafikksikring** vert teke inn i planstrategien for 2020-2024. Planoppstart vert i 2021 om det vert løyvd fylkeskommunalt tilskot til dette planarbeidet, søknad om tilskot til dette arbeidet vart sendt til Vestland fylkeskommune våren 2020. Søknaden vår vert etter planen truleg handsama i fylkeskommunen i løpet av oktober 2020.

Vurdering:

Rådmannen har no gjort klar planstrategien for 2020-2024 til godkjenning, den viser kva planoppgåver Austrheim kommune bør starte opp, eller vidareføra i kommunestyreperioden. Rådmannen vil understreka at planstrategien ikkje legg opp til å revidera kommuneplanen sin samfunnsdel eller arealdel i perioden 2020-2024.

Rådmannen vil og understreka at for å få planane på plass som er med i planstrategien for 2020-2024 er det ein forutsetning at det i budsjettarbeidet framover vert løyvd midlar til ulike typar planarbeid, men og sett av nok menneskelege ressursar til desse planoppgåvene på dei ulike avdelingane.

Om samansetjing av styringsgruppe

Rådmannen vil informera om at det i møtet 12. desember 2019 (sak 079/19) tok Bygdelista opp samansetninga av styringsgruppa i planstrategiarbeidet, Bygdelista ville utvida denne gruppa utover formannskapet. I kommunestyret den 13. februar 2020 vart dette og drøfta politisk, utan at det vart sett ned ei ny styringsgruppe. Dette var og tema på kommunestyremøte den 17. september 2020.

Rådmannen har no vurdert denne saka på ny og vil presisera at formannskapet også er planutval, med ordførar som leiar og varaordførar som nestleiar. Varamedlemmer er etter varaliste til formannskapet. Rådmannen meiner difor som før at det er naturleg at berre formannskapet er styringsgruppe for planstrategiarbeidet. Rådmannen ser ikkje noko god grunn no for å utvida styringsgruppa utover formannskapet så seint i dette planstrategiarbeidet. Rådmannen rår til som før at formannskapet er styringsgruppe for alt planarbeid i Austrheim kommune. Dersom formannskapet eller kommunestyret vil utvida styringsgruppa i planstrategiarbeidet eller i anna type planarbeid med fleire politiske representantar, så må dette fremjast og vedtakast i dei politiske møta av dei politiske representantane i møta der. Rådmannen synes difor det ikkje er naturleg at den administrative leiinga i kommunen skal vurdere den politiske styresamansetjinga i denne styringsgruppa eller i anna type planarbeid. Rådmannen råd difor til at styringsgruppa for planstrategiarbeidet og anna planarbeid vert formannskapet som i dag. Med dette ser rådmannen denne drøftinga som avslutta, og ser denne saka som ferdighandsama frå administrasjonen si side.

Siste fase av planstrategien:

Rådmannen er glad for at det er kome mange gode og konstruktive merknadar til planstrategien som har vore på høyring fram til 1. oktober 2020. Rådmannen viser elles til Austrheim kommune sin kommentar til kvar merknad og sluttar seg til innhaldet her. Det er gode og grundige vurderingar som legg til grunn for desse kommentarane. Endringar etter planstrategien var på høyring er vist under på ein oversiktleg måte. Desse planane er no kome inn i planstrategien:

-Detaljregulering for bustadområdet B07 og skuleområdet ved Austrheim vidaregåande skule (2021-2022).

-Detaljregulering av Gang og sykkelveg langs fylkesveg 565 frå Fonnes-Kilstraumen (2022-2023)

-Kommunedelplan knytt til rus og psykiatri (2021-2022)

-Plan for friluftslivet sine ferdselsårer (2022-2023)

-Kommunedelplan for trafikksikring (2021-2022)

Rådmannen synes det er naturleg at Landbruksplanen kan ha som plannamn ***Landbruks- og skogsforvaltingsplan.***

I formannskapsmøte den 22.10.2020, i sak 115/20 vart det bestemt at desse temaplanane skulle gjennomførast:

Temaplan: **Diskriminering og likestilling**

Temaplan: **Barne- og ungdomsplan**

Planstrategi for Austrheim kommune 2020 – 2024 (vedlagt) viser kor tid planarbeidet startar for planane.

Rådmannen synes elles at planstrategien som no skal godkjennast er godt gjennomarbeid og godt

fagleg basert ut frå utfordringane Austrheim kommune har framover.

Rådmannen rår i samsvar med siste innspel som formannskapet tok inn den 22.10.2020 til at ***Planstrategi for Austrheim kommune 2020-2024*** vert godkjent i kommunestyret.

Konklusjon:

Planstrategi for Austrheim kommune 2020-2024 vert godkjent. Styringsgruppa for planstrategiarbeidet er formannskapet.